



明倫彙編

退休集鈔

三三徑

東園新開九徑江梅海棠李橘杏紅梅碧桃芙蓉
種花木各植一徑命曰三三徑云

三徑初開自蔣卿再開三徑是淵明誠齋奄有三三徑一
徑花開一徑行

雪後東園午望

天色輕陰小霽中書眠初醒未惺鬆梅橫破屋無多雪雲
放東山第一峰不道風光虧此老將何功業答殘冬土羔
菜甲鵝兒酒醉入梅林化作蜂

答賦永豐宰黃巖老投贈

吾友蕭東夫今日陳後山道腴詩彌瘦世忙渠自閒不見

誠齋退休集鈔

逾星終每息卽凄然都邑黃永豐與渠中表問黃語似蕭
語已透最上關莫道不是蕭蕭乃墮我前佳句鬼所泣盛
名天所慳詩人只言黠犯之取飢寒端能不懼者放君據
詩壇

初夏

旋作東坡已水聲纔經急雨恰新晴提壺醒眼看人醉布
穀催農不自耕一似老夫堪笑死萬方口業拙謀生嘸紅
侮綠成何事自古詩人沒一成

枕上聞子規

半世經行怕子規一聞一歎一霑衣如今聽着渾如夢我
自高眠汝自啼

有歎



飽喜飢嗔笑殺儂鳳凰未可笑狙公儘逃暮四朝三外猶
在桐花竹實中

六月將晦夜出疑歸門

暑裏街頭可久停今宵無月也宵征一天星點明歸路十
里荷香送出城山轎聲聲柔艣緊葛衣服眼野風清五更
月出還家下不早相期作伴行

十六日夜再同子文巨濟叔粲南溪步月

際晚溪遊幕欲歸追涼逐勝却成違月如醉眼生紅暈山
作愁肩帶淡姿天下無人閑似我秋邊有句說誰知弟兄
一再更相送行到更深笑不知

重九前四日晝睡獨覺

睡息初酣過午彊起來四顧已斜陽添糊窗隔無風氣旋
轉

誠齋退休集鈔

二

驪衣裝有日香舊雨不來從草綠新豐獨酌又花黃去年
重九窮忙過可遣今年更作忙

立春檢牡丹

牡丹又欲試春粧忙得閒人也作忙新舊年頭將替換去
雷花眼費商量東風從我袖中出小蕾已含天上香只道
開時恐腸斷未開先自斷人腸

曉起探梅

一生劫劫只長塗投老山林始定居夢破青燈窗欲白猶
疑雪店聽鷄初

送簡壽王主簿之官臨桂

柴門草徑儘荂苔不放黃塵俗子來詩客清晨衝雨入梅
花一夜爲君開飄蕭落葉殘燈火陸續清談濁酒杯二十

一年纔四見驪駒抵死又相催

與侯子雲溪上晚步

入入溪園自掩門溪流新落兩三痕杖藜紫菊霜風徑送
眼丹楓夕照村行住忽然忘近遠陰晴未肯定寒暄多時
不出今聊出牧子樵兒一笑喧

新晴

瑤霜珠露兩相鮮玉宇金鉅萬里寬欲作一晴多少日早
知祇費數朝寒暴禾場裏鷄豚樂試筆窗前紙墨乾兒女
莫餐新浙飯打頭荷飯且輸官

留蕭伯和仲和小飲

誰曾白日上青天誰羨千鍾况萬錢要入詩家須有骨若
除酒外更無仙三杯未必通大道一醉真能出百篇李杜
飢寒纔幾日却教富貴不論年

新晴東園晚步

一日秋陰一日晴山禽相賀太丁寧不愁白髮千莖雪隨
喜黃庭一卷經晚霧薄情憎遠嶺夕陽死命戀危亭孤吟
莫道無人覺松竹喧傳菊細聽
忙裏清流也帶塵鬧中底物不長新水將樹影揮空帶楓
換秋容作好春自是不歸歸便得老來下筆筆如神醫花
剪燭無虛日賤相誠齋一老人

歲暮歸自城中一病垂死病起遣悶

素居猶寡歡巾車入城闈親舊久不見一見交相欣挽求
招我飲惟恐我出門不招我亦往不畱我亦存殷勤復如
許不佳我豈真是時梅始花吹香落金尊酒冽看果富咀

吸俱芳珍丞相我知已太守我故人言非汰塵雜塵雜不入言初談聖賢髓終談天地林向晚銜杯酒不樂復何云出郭雲尚明反郊日忽暮不怠日晷短却信雲已誤駿奔六七里逢店破亦佳澆愁幸殘尊照睡欺短炬荒鷄喚野夢晨起念速步升高乃復下故病動中腑昏吐懍欲絕低回不能去僮僕強我歸偶不隕中路老主猶倚強疾在自不悟及茲一委頓去死僅尺許人生信浮脆可笑何足懼所懼棄官晚行樂今已遽

曉登萬花川谷看海棠

準擬今春樂事濃依前在却一東風年年不帶看花眼不是愁中卽病中

走筆送趙正則司戶來訪覲親庭

誠齋退休集鈔

四

捧檄親庭歸帽斜宵臨破屋玉川家小留詩客三杯酒試看山闌幾處花人到東湖與南浦時當芍藥替金沙却來書滿參鄉好徑泛銀河犯斗槎

寄題儋耳東坡故居尊賢堂太守譚景光所作

先生初落海南垂茅屋三間不到伊更有高堂懸畫像幸無過客首新詩古來賢聖皆如此身後功名屬阿誰底事百年譚太守却教賓主不同時

八月十三日望月

纔近中秋月已清鴉青幕挂一團冰忽然覺得今宵月元不粘天獨自行

蛩聲

誠齋老子一歸休最感蛩聲五報秋細聽蛩聲元自樂人

愁却道是它愁

南齋梅花

朝來早起挂南窗要看梅花試曉粧兩樹相挨前後發老夫一月不燒香

早春

還家五度見春容長被春容惱病翁高柳下來垂處綠小桃上去未梢紅捲簾亭館酣酣日放杖溪山款款風更入新年足新雨去年未當好時豐

雪後寄謝濟翁村翁聯騎來訪進退格

封胡連壁雨中來自送歸鞍悵獨回隱几讀書寒入骨開門落雪皓平階急尋火種溫雙手自喚兒郎共一杯念汝野梅官柳路地爐松葉買茆柴

誠齋退休集鈔

五

春半雨寒牡丹殊無消息

今歲芳菲儘未忙去年二月牡丹香寒暄不定春光晚榮落俱違花命長繞一兩朝晴炫野又三四陣雨鳴廊對江魏紫拳如蕨而况姚家進御黃

初秋戲作山居雜興俳體

早起翻成坐睡昏鵲聲喚我步前軒竹扉日影針來大射壁千丸彈子痕

暑後花枝輸子春雜英小巧亦欣人素馨解點粉描筆卷扇愛垂鷄下唇

風騷開國昨寒嚴勞績批書課萃嵐黎子要肥千取百菊苗每摘一生三

昨夜天垂破玉盆今宵辛苦補盆脣看他補到十七八滿

得十分虧二分

甌頭雲子喜嘗新紅嚼桃花白嚼銀笑殺他人浪歡喜村人殘底到官人

七月初頭六月闌老夫日醉早禾酸莫將煮吃只生吃更

洩天機向達官

俗謂早禾酒爲早禾酸

自曝羣書舊開新淨揩白醜拂黃塵莫羞空腹無丁字且免秋陽晒殺人

獨對秋筠倒晚壺喜無吏舍四歌呼柳梢一殼茲緇萍屋角雙斑谷古孤

卓午從他大織張先生別有睡爲鄉竹牀移徧兩頭冷瓦枕翻來四面香

謝弭師余處恭遣騎惠書送酒

誠齋退休集鈔

六

鶻噪燈花雨太漫三朝五夜強相歡打門將軍還驚枕破屋闌人起着冠知已書從天上落焚香手把月中看少陵泛愛風名句羨殺寒儒眼不寒

同王見可劉子年循南溪度西橋登天柱岡望東山
偶因閑步散頑麻倦喚胡麻小佳些飛上山頭人似鶴回
看溪畔路如蛇雲烟極目知可愛松竹爲門是我家下得
山來飢更渴也無麥飯也無茶

和曾無疑贈詩語及歐陽公事

烏帽紅塵媿子陵綠簑青笠晚尋盟三千里外還家後七
十二回看月生與子兩人長對酌笑渠萬古浪垂名醉翁
若是真箇醉皁白何須鏡樣明

題道卿貧樂齋

雪茹冰餐入骨香，慢欺驢瘦儘詩狂。
人傳幼婦皆稱絕，鬼笑人家不姓方。
細雨寒燈初夢短，斷猿枯木一聲長。
上天已辦河東賦，豈有長貧靴戟郎。

乙未春日山居雜興

半月春晴探物華，山園走得脚酸麻。
從教三日風和雨，閉戶燒香不看花。

海棠重葉更妖斜，青帝翻騰別一家。
格外出奇人不識，大紅抹倒小蓮花。

金作林檎花絕濃，十年花少怨東風。
卽今徧地藥枝錦，不則梢頭幾點紅。

日影雲光學鑲金，好風不肖碎花陰。
人言春色濃于酒，不醉衰容只醉心。

誠齋退休集鈔

七

半晴半雨半晴涼，拖帶春容未要忙。
爲報州家更縣裏，吾鄉改作萬花鄉。

一春雨脚帶東園，柳絆花牽不暫閒。
今日醺晴天氣好，杖藜看水更看山。

暮春

花時追賞夜將朝，花過遲眠口儘高。
又與山禽爭口腹，執竿挾彈守櫻桃。

送蕭瑞卿

異縣二百里，分襟五十年。
官來尋病老，相對各蒼然。
舉似兒時語，茫如夢裏烟。
殘花猶可醉，細酌斗酒眠。

送分寧主簿羅寵材秩滿入京

要知詩客叅江西，正似禪客叅曹溪。
不到南華與脩水，十

何傳法更傳衣吾家親黨子羅子只今四海習鑿齒花紅
玉白幾百篇塞破錦囊脫無底三年簿領修水涯夜半親
傳雙井芽定知誦向百僚上不道長江與落霞

書黃廬陵伯庸詩卷

句法何曾問外人單傳山谷當家春截來雲錦花無樣倒
寫珠胎海亦貧汗竹香中翻墨汁扶渠梢上掛頭巾詩名
官職看雙好向道儒冠不誤身

木犀芙蓉盛開

先生淡仕萬山村霧裏雲包不見痕也被閑人知去處芙
蓉巷裏木樨門

謝張功父送近詩集

十年不夢歎紅塵惱亂閑心得我噴兩夜連緡約齋集雙

誠齋退休集鈔

八

眸再見帝城春鶯花世界輸公等泉石膏肓探病身近代
風騷四詩將非君摩壘更何人

范石湖尤梁溪蕭子巖陸放翁

寄謝蜀帥袁起巖尚書閣學寄贈藥物

拋官歸隱七經年睡殺山雲笑殺天剩雨殘雲黃帽底顛
詩中酒白鷗前少年行路今已矣厚祿故人書寂然只有
錦城袁閣學寄詩贈藥意悄悄

寄題安福劉道協涌翠樓

讀書臺南山繞屋恰是萬簷削青玉讀書臺北山更多又
似碧海躍萬波臺邊高人子劉子架樓南北山圍裏醉中
領客上上頭忽驚平地翠浪浮一浪拋雲入天半衆浪翻
空濕銀漢碎轟打倒闌干前天跳地蹕乾坤顛賓主拍手
呼釣船定眼看來還不然是南北幾點山

走筆謝吉守趙判院分餉三山荔枝

吾州五馬住閩山分我三山荔子丹甘露落來鷄子大曉
風凍作水晶團西川紅錦無此色南海綠羅猶帶酸不是
今年天不暑玉膚照得野人寒

足痛無聊地坐讀江西詩

兩脚徧雲水羣書久網絲却因三日痛理得數篇詩不借
雙高挂毋追一任欲老夫非愛病不病亦何爲

夏夜露坐

火老殊未熱雨多還自晴暮天無定色過鳥有遺聲坐久
人將睡更深月始明素娥欺我老偏照雪千莖
山翠都成黑天黃忽復青月肥過半壁雲瘦不遮星瓦鼓
三四隻村酤一兩瓶人皆笑我醉我獨笑渠醒

誠齋退休集鈔

九

同劉季游登天柱岡

兩箇胡牀小憇些一枝筇杖挂傾斜烟雲慘淡天將雪風
日荒寒梅未花人去客來沽酒市鷄鳴犬吠野人家清游
不用忙歸去強管行程是暮鴉

不睡

夜永無眠非爲茶無風燈影自橫斜擁裯仰面書帷薄數
盡承塵一簾花

清愁無數暗相隨酒是渠讐也是媒醉裏不知何處鞦韆
人醒後一時來

醉吟

三春草草眼中過未抵三冬樂事多燭燭雙了紅再合酒
花半蕾碧千波孤寒霜月儂相似跌宕風雲誰奈何道是

閑人沒勳績一枝樵斧一漁簑

送士文伯上舍歸豐城兼簡彭侍郎

碧落先生少可人銀鈞繭紙苦稱君談間口吸西江水句裏家傳南浦雲千里端能來命駕一尊得與細論文還家剩草三千牘看策平津第一勳

讀張文潛詩

山谷前頭敢說詩絕稱漱酒掃花詞後來全集教渠見別有天珍渠得知

予與客嘗茶糜瀉酒客求其法因戲答之

月中露下摘茶糜瀉酒銀餅花倒垂若要花香熏酒骨莫教玉醴濕瓊肌一杯墮我無何有百罰知君亦不辭勅賜淡之能幾許野人時復一中之

誠齋退休集鈔

十

初夏卽事

百日田乾田父愁只消一雨百無憂更無人惜田中水放下清溪恣意流

更無一箇子規啼寂寂空山花自飛啼得春歸他便去元來不是勸人歸

詩酒懷趙德莊

德莊對客不瀟茗傳觴半杯曰某各趙半杯君知否余老病亦只飲半杯

舊日張三影今時趙半杯誰將牌印子牒過草廬來一代風流盡餘年鬢髮催愁邊對詩酒懷抱向誰開

端午獨酌

招得榴花共一觴艾人笑殺老夫狂子蘭赤口穰何益正則紅船看不妨聞粳明朝便無味菖蒲今日麼生香一生幸免春端帖可遣漁歌譜大章

至後入城道中雜興

大熟仍教得大晴今年又是一昇平昇平不在簫韶裏只在諸村打稻聲

問渠田父定無飢却道官人那得知未送太倉新玉粒敢先雲子滑流匙

畦蔬甘似臥沙羊正爲新經幾夜霜蘆葍過拳菘過膝北風一路菜羹香

長亭阿姥短亭翁探借桃花作面紅酒熟自嘗仍自賣一生割據醉鄉中

豐年物物總欣歡不但人和畜亦蕃鼓處金膚肥甕母春餘珠屑飽鴛孫

再入城宿張氏莊早起進退格

誠齋退休集鈔

十一

夢覺月如書誤驚天欲明起吹松葉燼自點柏花燈山轡已十里譙門纔四更脚跟豈無火鬚上也成冰

暮行田間

布穀聲中日脚收瘦藤叫我看西疇露珠走上青秧葉不到稍頭官使休

水滿平田無處無一張雷紙雨中鋪新秧亂插如井字却道山農不解書

進退格寄張功父姜堯章

尤蕭范陸四詩翁此後誰當第一功新拜南湖爲上將更牽白石作先鋒可憐公等俱癡絕不見詞人到老窮謝遣管城僮已曉酒泉端欲乞移封

雨中入城送趙吉州器之

拂溪楊柳縷生金，欄路山礬香殺人。不是衝關送行客，外頭放過若于春。

村店農忙半不開，入城客子去還來。阿耶烏傘兒青笠，賣却松柴買菜回。

次公秩滿來歸偶上巳寒食同日父子小酌

又是一年修禊時，何須曲水泛金巵。遍嘗衆酒少亦醉，坐到三更眠未遲。上巳巧當寒食日，春風慳放牡丹枝。白頭父子燈前語，忘却江湖久別離。

十二月二十七日立春夜不寐

冬夜嫌長只望春，春宵又永更何言。曉梢強合終無睡，脚底相摩也不溫。竟夕松風聽到曉，半明燈火看來昏。擁綯却起蒙頭坐，顧影真成一病猿。

誠齋退休集鈔

十二

長孺共讀杜詩

病身兀兀腦岑岑，偶得兒曹文字林。一卷杜詩揉欲爛，兩人齊讀味初深。斲肝枉却期千載，漏眼誰曾更再尋。筆底奸雄死猶毒，莫將饒舌泄渠心。

族人同諸友問疾

摩詰沉疴未易排，文殊一問失妖災。老夫何幸羣賢集，倒履出迎雙眼開。語造極時全愈了，病知客去卽重來。呼兒細揀新書冊，體不佳時看一回。

病中復脚痛終日倦坐遣悶

滿眼生花雪滿顛，依稀又過四雙年。誰知病脚妨行步，只見端居例坐禪。墮扇几旁猶懶拾，檢書窗下更能前。世人揔羨飛仙侶，我羨行人便是仙。

病中七夕

良辰美景底須來苦雨如山正滿懷
蟬度清歌侑溪柳花吹黃雪灑宮槐
新秋風物俱堪賞久病心情自不佳
說與兒童休乞巧老夫守拙尚多乖

巳丑改元開禧元日

開禧元祀更元正宿雨新收放曉晴
夜半梅花添一歲夢中爆竹報殘更
方知人喜天亦喜作麼鐘鳴鷄未鳴
老子年齡君莫問屠蘇飲了更無兄

病中春雨聞東園花盛

萬類欣欣一老悲物華豈是不佳時
病夫自與春無分好景非干我獨遺
花底報來開已鬧雨中過了更曾知
風光九十今強半又約芳菲隔歲期

誠齋退休集鈔

十三

雨霽看東園桃李行溪上進退格

藥裏關心正腹煩強排孤悶到東園
行穿六六三三徑來往紅紅白白間
繞樹仰看渾弗見隔溪回望不勝繁
村村桃李家家有脚力酸時坐看山

病中感秋

病中一別抵三秋况見西風在樹頭
老去能禁幾回病秋來不爲別人愁
書帷夢覺疑僧榻竹戶涼侵似客舟
壽外康寧方是福不然徒壽不須休

送藥者陳國器

竇憲一舉空朔野曹霸一筆空凡馬
吾鄉藥者有陳生一丸洗雪萬藥者
庸醫皆笑澗下水陳生酌來便是上
池底也只不離神農

書書外別得一亡珠也只不出岐伯論論外別得舌一寸
舊遭痔疾惱殺儂新遭淋疾與合縱恰如住在圃田國晉
楚腹背來夾攻陳生贈我玉函子乃是華陽洞中垂龍耳
陳生贈我紺葉紗乃是金鴉脚底扶桑花汲泉親手煮蟹
眼一腕枯腸如碗沙平生舊疾蟬殼退秋風吹落青天外
更傳枕中鴻寶方戒勿浪傳泄天藏君不見回岩仙客逢
貧子指石成金吾濟爾貧子再拜不要金祇覓指頭吾自
指

除夕送次公子入京受縣

過眼光陰又歲窮相看父子一尊同春回雨點溪聲裏人
醉梅花竹影中汝趁暄和朝北闕我扶衰病見東風弟兄
努力思報國放我滄浪作釣翁

誠齋退休集鈔

十四

十月四日同子文克信子潛子直材翁子立諸弟訪
三十二叔祖於小蓬萊酌酒摘金橘小集戲成長
句

誠齋老子不奈靜偶挂烏藤出苔徑獨游無伴却成愁羣
從同行還起興每過一家添一人須臾保社如煙雲褰裳
涉溪溪水淺着履渡橋橋柱新蓬萊一點出塵外南溪裏
在千花裏芙蓉照波上下紅琅玕繞屋東西翠檣籬竹戶
重復重雞鳴犬吠青霞中蓬萊老仙出迎客朱顏綠髮仍
方瞳餐葍爲糧露爲醕染霧作巾雲作屨忻然領客到仙
家行盡蓬萊日未斜更傾山瓢酌山酒酒外瓢邊亦何有
偶看小樹雙團欒碧琉璃葉黃金九主人忍喫不忍摘笑
道未霜猶帶酸小童隨我勇過我不管仙翁惜仙果手撓

風枝揀霜顆爭獻滿盤來
飢坐隔水蓬萊看絕奇
蓬萊看
水海如池主人勸客對絕境
不飲令儂坐生癭何如寄下
未盡瓢畱待早梅賞疎影

嘗桃

金桃兩釘照銀杯
一是栽花一買來
香味比嘗無兩樣
人情畢竟愛親栽

止酒

止酒先立約庶幾守得堅
自約復自守事亦未必然
約語未出口意已慘不歡
平生死愛酒愛酒仍棄官
憶昔少年日與酒爲忘年
醉則卧香草落花爲繡纒
覺來月已上復飲落花前
衷腸不禁酒此事今莫論
因酒屢作病自索非關天
朝來復苦痛飲藥痛不痊
銳欲絕伯雅已書絕交篇

誠齋退休集鈔

十五

如何酒未絕告至愁已先
我與意爲仇意慳我不歡
何如且快意伯雅再遣前來
日若再病旋旋商量看

秋涼晚酌

寄老山林度懶殘
新秋又是一年年
青編翠竹風牕月白
酒紅葉水榭天暑欲謝時
偏更赤儂當醉後
怨渠顛古稀尚隔來年在
且醺今宵藥玉瓶

乙卯春日三徑行散有感

東園一日走千尋
又見飛龍第一春
桃李成陰儂已老
江山依舊歲還新
穿花踏影渾無日
隔徑聞聲不見人
學省同寮各是散
白雲山裏伴閒身

十一月朔早起

拋笏投簪四見秋
官情世味兩俱休
座隨日影穿牕戲
葉

卷風聲刮地愁文武自勾香底火聖賢教帶老時愁夜來
富貴非人世夢釣滄浪雪滿舟

新霜

得得今來未有寒天公小靳不全判欲呈瑞雪飛花樣先
遣濃霜起草看瓦春生春總瓊玉梅梢着粉忽琅玕老失
到老嫌冬熱十指朝來出袖難

中塗小歇

山僮問遊何許村莫問何許但出門脚根倦時且小歇山
色佳處須細看道逢田父遮儂住說與前頭看山去寄下
君家老瓦盆他日重遊却來取

積雨小齋

雨足山雲半欲開新秧猶待小暄催一雙百舌花梢語四

誠齋退休集鈔

十六

顧無人忽下來

和虞使君易簡字知能所寄唐律二首

四海九州虞雍公擎天一柱雪山峯厥孫俊逸詩無敵下
筆縱橫劔有鋒舊日門生今白髮故人書札照蒼松掉頭
讀得紗巾落如對青雲阮仲容

柴桑因病一茅廬或掉孤舟或命車道喪今朝逢祖謝詩
工獨步過應徐萬山不隔相思字數月之間雨得書廊廟
方將訪喬水碧梧翠竹看新除

曬衣

亭午曬衣曝襪衣柳箱布襪自攜歸妻孥相笑還相問赤
脚蒼頭更阿誰

九日菊未花

舊說黃楊厄閏年今年併厄菊花天但接青蕊浮新酒何必黃金鑄小錢半醉嚼香霜月底一枝却老鬢絲邊阿誰會得開遲意暗展重陽十月前

曉看芙蓉

兩歲芙蓉無一枝今年萬朵壓枝低半紅半白花都開非短非長樹斬齊臨水醜粧新雨後出牆背面曉風西春英笑殺秋英淡祇恐濃於桃李蹊

久雨妨於農收因訪子上有歎

君能過我意如傾我每看君脚便輕若爲泥塗間還往端令老病荒心情未霜楊柳秋猶碧旣水芙蓉晚更明早歲嫌晴不嫌熟今年教熟不教晴

誠齋題三老圖

誠齋退休集鈔

十七

劉訥敏叔秀才寫乘成先生平園相國及予爲三老圖因署其後

劉君寫照妙通神三老圖成又一新只道老韓同傳好破人指點也愁人

甲子春初卽事

只有觀書樂其如病眼何但令吾意適不必卷頭多人怨花遲發天教暖早催不知要催落却道是催開晚得看花訣丁寧趁絕晨乘他醉眠起別是一精神

挽酌

暑天寒果飮來餽水果清於水果休蓮入新秋何更瘦菱沉到底竟能浮山泉釀酒香仍冽野藪堆盤爽更幽方丈食前非不愛風蟬一腹飽詩愁

七夕後一夜月中露坐

十七起從荆南帥辟書寫

火雲散作鬱金雲
簷際移牀偃病身
古井石崖新汲水
花洲苔砌蕩晴塵
風纔小動即停吹
竹自不涼那及人
獨感今宵上弦月
桂梢分露滴紗巾

直少風人瀟灑之致

石門漁舍

漁家在何許
踏破蒼苔下
石花樹幾株
芳湖山數峰
碧窠亭遂古
雙闕天自白
錦綉天交金
藤蘿封筆欄
吾為江上遊
形若世間役
心馳定沙步
舟行過簷隙
浪翁底鑄銘
若斯人徒風雲
相主客

薛季宣字士龍永嘉人年十七起從荆南帥辟書寫機
宜文事由武昌令召為大理寺主簿大理正出知湖州
改常州年四十而卒季宣為程門再傳而所言經術則
折學也故浙人宗之其詩質直少風人瀟灑之致然縱
橫七言則盧仝馬異不足多也

石門漁舍

漁家在何許踏駁岩下石花樹幾株芳湖山數峰碧窠樽
亭遂古雙闕天白關錦綉入茨舍藤蘿封筆柵吾為江上
遊形苦世間役心馳定沙步舟行過簷隙浪翁底鐫銘太
尉此居宅豈若斯人徒風雲相主客

遊竹陵善權洞二首

浪語集鈔

萬古英臺面雲泉響珮環練衣歸洞府潤水側流入水洞中香雨落

人間蝶舞疑山魄花開想玉顏幾如禪觀適遊納戲澄灣

寺故祝英臺宅唐昭義帥李贛嘗見白龍出水洞而為雷雨今小水洞存鱉魚四足

左右蝸蠻戰晨昏燕蝠爭九星寧曲照三洞獨何營世事

嗟興喪人情見死生阿誰能種玉還爾石田耕山有三洞九斗壇故

更寺觀者不一再有李後主斷還僧寺批札石記語極可笑大水洞有石田數十町奇絕

都場正月盡未見梅息雪中石門之遊作

千里春何晚三旬暎不回眼青暝縣柳粉白闕宮梅麗水

年時泛桃花雪裏開軒轅丘一夢懷往息悠哉石門之上

有軒轅之丘

謝客窮幽處仙宮隱薜蘿二峰幾魏闕雙瀑瀉天河狃獮皆出

應難致猿猴却患多雪中山更好淹歲定如何石門山中

狔類猿而綠猢猻類狗而黃蓋猢猻屬之大者狔讀如黃殆所
謂狼狔也猢字書音黃去人作去聲呼之狼讀如胡

吳江放船至楓橋灣

所謂越來溪也

短篷負長虹破籬掛明月風馬座中生天幕波中出高城
多隱映遠岫攙羅列少小泛吳江始識仙凡別

送士昭兄赴南外敦宗院

憶昔南州去松根眺邑鄜鳥啼雲裏樹人入洞中天載陟
今時路須航古渡船地窮噉噉盡蚤晚濟平川

松花唐玉蘂花介甫謂之瑒花魯直謂之山礬武昌

山中多有之其葉可供染事土人用之釀酒

松綠吐瑤琨冷然郭外村仙人來玉蘂文士立山礬芳澤
留絲素風流付酒樽莫言瑒酷似香處不勝繁

樊圃雨後瀟望皆平蕪綠草無復花矣

浪語集鈔

二

候客樊圃道新晴致日佳萬般詩外意百種夢中花蔓綠
鋪平野江流襲漲沙無如石頭滑龍首粲新芽

讀三國志

左角蠻攻觸南柯檀伐槐徘徊記名字人物委塵埃錦里
昔曾到樊川今此來遺風不可見觀古意悠哉

作落回路得家書是夕有歸夢

夢入江南路依然識舊廬家人話生計兒子督程書繚繞
俗緣在纏綿習氣餘金雞驚悞我安問未爲疎

江行卽事

春信潮聲急滔滔掩岸沙客船離浦澈漁笛起蒹葭盪槳
水光碎轉山帆影斜篙工指煙樹依約有人家

誠臺雪望懷子都三首

白也今良嗣千年壁一雙文忠泉漱石色照月明窗樸傲
空焚渚飄零遠漢江此情誰與度木介響琤琤

狂遊失可人萍聚我和君千里共明月幾山空白雲擊雕

飛墮毳嚙雪冷冰皴百歲無多子離居困索羣李性剛直同官目爲

聯李

揜脛誠臺雪吟頭祇自昂梅花開嶺路水玉皴池塘良馬
日千里美人天一方尺書不可寄道義兩相忘

和賈籛

官冷君休歎浮名陌路車水山逢嶼泮豆粥併寒除但酌
樽中酒從堆架上書未酬題柱志終不羨相如

忌日雪

荼毒惟何其同時失所天哀傷逢此日懷抱憶初年白雪

浪語集鈔

三

明心素青松黯墓瑛不堪陳八席罪罟欲誰究

稱忠

遠仕租千石虛名酒五經豈能千日醉未勝九年耕識取
杯中趣知從袋裏乘讀書無一事宦宦汨平生

讀邸報

世味刀頭蜜人情屋上烏榮華葉子格升黜選仙圖豺祭
知生獸虵銜欲報珠不將魂夢到反是憶尊鱸

春陰

讀王黃州小畜集

春晝閣春愁無情若隱憂柔腸牽柳眼困淚點花頭不放
春風度從教暮雨休哀憐無限意小畜閣黃州

送鄭景望赴國子丞詩二首并序

湖之江渾但漫平而委長有山焉截乎江之口其潮也

尾閭盈而瀆瀑海水溢而羣飛回江之波倒流而反觸於山其濤怒衝乎渾其波激委之至也遠其爲憤也瀄崩騰洶洶洄瀾藏昂驟蹙而軒乍旋而入岿盈淵谷前無高岸一川矗立突如來如屹如銀山犇如陳馬轟如雷鼓激如搏鵬子胥奔躍于濤頭文種昌揚其暗浪雖共工氏折不周之柱左伯母彈恒山之目拔山如項羽驅石若始皇未足以礙其壯天河裂龍門發呂梁洩汾防決淮隄撤猶不得形模其彷彿也操舟者逆而取之順而方之呼吸之中恬然已無事矣濤之力也有旣故吳兒可狎而弄其去也有時故行人可厲而涉走嘗聞諸濱江之老叟曰江之產有煩苛其涉有陷沙煩苛豸也螻蝻比也形如飄瓦呀吻衆多狎者遭焉則若身而

浪語集鈔

四

不真沙之雜也多淖則人之履踐不實涉者俄而陷溺則僵爲汝之濫君子者曰操舟者子其神乎憑乎虛舟凌乎巨浪逆而取之不害其爲正順而方之不害吾之止故雖濤水掀天而吾不爲之蕩橫流溢壑而吾不爲之撓持危涉險竄默而成之其眎涉者吳兒爲有全安之數矣子鄭子一鄉之望其赴國子丞也固當爲時世用鄉人又將儀之夫國子清官子鄭子和而不流者也旣清且和利用安身而崇德矣其行也必將闡津於淝走期之以舟楫之利琢詩爲贈且序陷沙煩苛之說所聞於父老者而冠諸篇端

風喜橋烏順知難喚酒杯好溪寒已半京洛夢應回僧舍方飄雪江籬欲放梅不須愁國步之棟梁材

愷我論交晚何堪又索居朝陽鳴必風清水察無魚百惱
恣成解羣疑鬼輓車否滅亡可道贏得腹詩書

種蘭

蘭生林樾間清芬倍幽遠野人坐官曹茲意極不淺西窗
蔽斜日松欵架春晚墻陰蒔花木憔悴根日損植此以國
香坐與前事反扶疎可紉佩心緒端有本芽生僅盈壇高
風九成晚羣芳顏色好祇自誇園苑何如淡嚼蠟草莽曾
誰混對我靜無言忘形如莽筭

刈蘭

東晚刈真香靜院簾瓶水高遠不勝情時逐微風起和雨
剪閑庭誰作騷人語記得舊家山香來無覓處

石盆

浪語集鈔

五

髯翁久埋沒歲月來成奔當年膾魚處蓋白徒形存想方
高會時猛士侔雲屯連鰲覲一釣欲以大口吞尺鯽到紅
雪烹葵植蘭蓀王餘弃玉食銀刀亂洞沚墮臺不禁醉網
漏如鯨鯢座中盡羣彥人亡失叢播吾遊懷此都重到郭
外村聊與廣武歎衰衷受辛益頽然鳳凰臺路走臨津門
催歸趁人馬誰念古帝魂愁無有力者窳樽負雲根斯焉
共杯飲垂綸具盤殮

得符速走之官

我本樂閑人自得安閑志鄙性習疎散誰識榮華意揭來
復舊廬喜獲平生志稼穡任佃夫家室歸中饋中外若非
我卒歲無他事飽飯讀詩書優騰時困睡嘲嘲燕雀懼鴻
鶩心應異三皇竟何物况復今官寺寒餼課妻孥先春輸

典質茲乃不可常爲貧求祿仕版籍一書名野情那得遂
官來促我裝去作塵埃吏無復有消搖真爲口腹累把板
從此行短褐隨弃置素殮良不堪邑有民人寄衆心險山
川道微非所暨上恐負朝家終念家聲墜吾民政焦嗷爲
此不能寐格物可爲邦舊說今難試泥古誠腐儒惟此知
爲治仁義舍不爲又敢圖與利上官如我容刑章得就易
庶以遂其生將久蘇疲瘁此意尚茫然思之或狂悖

新作殊亭

虎將夏中時旋復怡亭址茆茨覆采椽樸拙亦可喜建斗
五移杓殊亭更釋子規摹雖少華不陋復不侈元碑碎俗
令遺集囊空紙縱步此山椒金聲猶屬耳舊亭苦弗稱新
亭直殊美書文兩奇絕蹤蹟存布指古人久不見今人尚

殊此能知古今意元始本無始

春陰

春陰一何甚愁結窗外花細雨打踈竹洎洎草新芽眷此
忽中慘吾生浩無涯閑讀八上書可歎復可嗟時流諒難
追世路亦以賒折腰墨綬早坐有憂患加官柳粲新綠黃
鸝語淫哇把盞但心醉天外日已斜魄月沉半壁歸飛噪
啼鴉仰頭望虛碧冥冥密雲遮風塵政昏暗逃形乏浮槎
顧影還自笑狂遊蕩無家弩頭強應世鈍若倒披蛇虺人
營舊廬清池傍蒹葭芳時綉文錦翻濤散晴霞霽色故自
好風霾益云嘉何當舍此去忘情傲丹葩

跋東坡詩案

南方有佳木遠在漲海涯沉水產其節雞舌生其肌結根

松栢塲龍腦實離離
齋豈知青斧斤
斬斲枝椽爲糠粃
槽將食犬與豨
條枚惡鬚曲芟除
弄江湄滄流蕩回波
不與朽壤期
年代知幾閱
愈久乃見奇根株
到餘捩復恐分
寸遺終焉盛
芬烈蘭蓀謝芳姿

濟江逆田開府過西陽俞氏家林

輕舟時復到齊安
一過漁家一黯顏
江打頽墻開野徑
篁生故壘上家山
蕭騷城郭塵埃外
縹渺煙霞雲水間
便好繫船終日卧
官曹不許片時間

宿大城寺與寺僧行郡子故城於壁壘間得銅矢鏃

土中螺殼往往不壞
僧言初作此寺發殿基下有
古甌渠宮城中得銅矛矢鏃
百數南城中土窖積
灰埋鵝首骨猶具自甕城
北望有郡王墓僧云其

浪語集鈔

傍墟塚甚多王墓常有巫者發之未開被蜂毒死
巫家於懷袖間得蜂乃黃金所化

二千逆數到春秋戰國興亡一轉眸
壘壁詎銷埋蚌殼劫灰寧燼斬鵝頭
墳緣開發金成范殿爲焚脩瓦出溝
哨矢焦銅傷我意古來爭戰幾曾休

周將軍廟觀岳侯石像

侯祠初毀道士不忍壞侯像沈荆溪中因得不壞

萬死何知獄吏尊
威名蓋代古難存
侯初下大理獄吏執筆請辭大書其紙尾而吐之曰汝觀今世烏有大臣繫獄而生者趣具成案吾爲汝書
二桃豈爲功南粵一軀

不容身退論幾爲
飲江息道濟繆爲
圖像削王敦沉碑千

古蛟川恨留與無窮客斷魂

雨後憶龍翔寺

好溪東赴海門
秋中有禪居湧碧流
潮信往來雙別嶼
世

綠生滅幾浮漚菱歌而面來魚鼓燈火層層到客舟何事
瓜期外留滯短窗斜雨不堪愁

宿大城寺 寺乃郡王故宮

斷煙疎竹瓊樓臺郡子如今安在哉明滅故城無限意紫
薇花傍夕陽開

春草曲

二月二日未旦夢遊遇濼旋返見羣女魚貫舞入大第
行歌春草之曲其聲宛轉清暢不類今之樂府寤而追

記其詩

散雪枝頭寒已老平蕪一夜鋪春草江梅着子怯東風花
落滿庭渾不掃

赴調

浪語集鈔

八

三年蹤跡走泥途走過泥途一事無今日又行當日路有
人爲我一邪斂

無題

朦朧夜色暗浮雲咫尺氛埃怯戰塵深夜鳴榔到庭戶江
湖知有釣魚人

酴醿花謝有感

當初曾醉浣花春席地棠梨當錦茵今日酴醿飄似雪閑
忙不比舊時人

聞鳩

桃李無情花自妍竹根行復破苔痕新婦抱兒未歸去愧
死鴛鴦啼滿園

十四日從諸同官登西山郊壇岡次孟監務韻

菩薩巖前湛佛乘澄泓無復現天燈強歌下俚酬春雪便
好爲文手剝藤

清遊無是亦無非陡絕圓壇一強躋赤壁望中公瑾在戰
塵何日靜征鞞

人間萬事盡浮埃顧影窮遊莫倦陪吳王百世不復在只
有九伊郊天臺

歸計二首

浮雲何處是生涯念絕營營卽是家洗脚渡頭歸去也漢
津無用逐靈槎

置錫無地也無錫幸可歸來特地疑船子月輪貪未破羅
浮焉用石頭爲

青田同七五兄作四首

浪語集鈔

九

爲聞雙鶴訪青田便有孤雲竟目前灘水自鳴山自綠短
蓬斜掛得酣眠

烏雲送雨過前山白鳥將雛向遠灣獨立溪亭無箇事滯
流瀧石鎖滄游

浩歌欵乃客銷魂一抹煙林暝遠村花爲忘憂人一笑不
知風雨作黃昏

谿翁夜傍清溪立千尺絲綸一紅粒天空月白不見人無
聲露滴蘋蓼濕

讀鬼詩擬作二首

坐對悲風曠晚山征鴻不記幾回還青銅蝕破菱花面慵
掠烏雲縮善鬟

玉藥紛華苦未真至遊無朕亦無身細看浮世多塵盆如

我得歸能幾人

雨後憶龍翔寺

二峰高峙夾禪扃長落潮音逐磬聲老僧睡起絕無事不
管波濤四面生

村居秋暮

風回偃水縠紋平林木它山筆架橫場圃未閒黃葉下鶉
鳩啼雨忽啼晴

携筇

一扁閒等五木經樞操盧白意冥冥未能後擲如前擲將
奈長亭又短亭

六月三夜夢觀某人詩什其書一章四絕蓋絕筆也

走讀說太乙真人來告語青猿手裏得長書靜聞

浪語集鈔

十

丹竈風中雨之句夢而默記之寤矣作詩導意

多謝真人警夢書青猿馴擾尚趨趨任從爐鼎喧風雨爭
奈神明復古初君樂煉形阻丹火我甘飲水灌園蔬惟當
敬佩終焉意予欲無言致匪虛

樊口見鄭崇陽不遇

經時兀兀坐筠鄉命駕崎嶇傷夕陽烏嶼西陵開罨畫湖
山東鄂洗新裝路侵細草迷繁綠風落閒花憶舊香却上
渡船歸去也不逢安道故無妨

誠臺晚意

麥夏西山日脚斜峰雲千里盡丹霞晴嵐榭桷水春漲芳
草園林路晚花遠近子規啼怨抑高低乳鸞語淫哇官身
歸是何年社信美誠臺不似家

新晴

起人舒慘作陰晴九十春光只雨零宿草未萌波漠漠落花歸盡葉青青風生遠嶠銜明月霧激長江吐漲汀天意乍回心自廣片時雲路覺無形

從孫元式假定本韓文

揚墨衰周亦旣微仙曩變夏用
回瀾豈直萬人敵斷
簡傳將百世師脫落間亡鳥
劍墨蠹殘寧免白魚辭校讐
歆向君無愧聊以新詩當一椀

校畢歸之

倒墨扶周復古文清輝萬丈醉乎醉七篇奧義遠相繼六代潛光今又新字假通才識魚魯車慙寡學改金銀異書喜得君無靳此道中興知有人

浪語集鈔

十一

勸農出郊

漫驅戎馬說農郊不見田疇見白茅洪道曉晴明水底羊瀾春漲長林梢紅翻大澤霞方散青入空原草漸苞迎暖示民民自勸可須杯酒薦烹炮

冒雨渡江弔喪彭氏造雪堂夜歸

月波樓下草芊芊浪拍三江起暝煙願見古人人去欲詢往事事無傳窪樽明滅漁家火樊口依稀估客船妻子迎門應怪笑問君何謂苦周煎

武昌懷古

漠漠煙村一故城郊壇離殿草萌生青山不解知興替銷黯開顏爲雨晴

筠鄉入夏野花方拆

牆匝叢叢綉舞茵一般顏面各精神筠鄉不爲東君去野
草開花滿路春

晚渡東坡

赤鼻磯頭橫曙煙吳王城下浪連天聞道東坡妙天下爾
來靡日不盤旋

浮生萬事盡塵埃瑞慶堂今榜快哉惟有東坡舊煙柳道
人猶解指莓苔

寒食雨

言歸社雁已家鄉紫燕呢喃識舊梁甚雨疾風寒食夜旅
人情緒一思量

嘲欲借予雜藁者

神文道本可言形退也能藏用卽行要得任牽驢狗在無

浪語集鈔

十二

端何似借書生

郎君到底亦何知奪卷書生真數奇惡語故應多艾氣殘
態無用寫來詩

送張漕還停舟樊港訪退谷

送客過樊谿停橈退谷口不見元次山靜立躊躇久巉巖
兩石峰猶疑入戶牖杯湖正宜泛堙塞僅盈肘糞壤瘞杯
樽勿復堪堵酒扁舟泛然者長歌挈敝筍浩無風塵意將
恐是聲叟自知千進客對面弗敢扣從之人甚遠燕處爲
之厚武昌非昔人望絕不得友宅時賦歸歟湖谷定吾受
此心介如石自誓何樊母

子規恨

風簾扣吾扉有人來我語語好不須多都不如歸去開門

我見客客子今何許竹下得流虹八言爲杜宇杜宇昔王蜀不自安當寧相歸密淫遊微行時踞踞蛟龍失水困哀怨成飛羽規名釋爾雅茲事則然台楊雄蜀本紀望帝亦賢主仙去正啼規去思傳往古不妄信斯言王去非輕舉蒼天悲此民故使規聲苦脫屣感斯意八極歸客身勤今惟一人後躅追無侶所以百世下直指不得數聲盡斷以血空教溼肝腑其然豈其然臣事君看取

聞齊安雜詠板成從沈守求印蒙以爲贈

獻縣西南弦子國使君昭代文章伯氣吞雲夢納東坡心在江湖輕赤壁月波蕩漾春山色擘磔洲草芊芊碧政平訟簡暇居多杖屨逍遙神自適到眼風光看如畫覺畫溪邊舊遊者高亭矗立畫不如坐嘯雲屏自天寫使君好客非春申一憂已足無餘人哦詩五百盡清警立使江山景物浙江山景物古來有前賢相與天長久近來百草漸埋沒賴有此詩爲一剖使君好善人如已稜板巾箱波遠邇良知何獨此麻城天下行聞爲商起我拘官禁儻枕葦跋望亭高衣帶水高唐想像賦神遊遊客言詩詩信美空書從學穆清風得見異書人見同解嘲不用潘邠老只在先生指顧中

浪語集鈔

十三

香棠

舊說海棠無香惟昌州海棠有香驗之蜀道信然以爲不易之論樂圃有棠三本其花亦香乃知非蜀棠獨香香棠自有種耳

世間元有無窮恨海外棠花宮錦爛燒豕東風春未半濃

裝獨立情纏亂博山爐冷沈煙斷記語洛妃池側畔袿衣
透濕飄香汗舞罷霓裳高燭看吳苑散花難彼岸亦有當
初舊遊觀棠梨古逕霞光燦薔薇露冷衣新盟袖卷燕支
紅入腕噴人蘭芷芳都貫天然種性真奇玩嶺海誠知煎
可爨擬擷柔柯燃熾炭哀取絹巾永傳玩它年留得重公
案

鄂城篇

袁山野火春風吹驚騰萬馬爭奔馳烏龜阪頭蕃草木化
作灰燼張天飛武昌佐史皆好古煖茗聯鑣訪城府狂生
此意復不淺好事大家何爾汝鄂王城闕煙蒼蒼鄂王宮
殿波茫茫今古都盧一餉頃不見古人虛引領毫殷豐鎬
已丘墟蠻荆地替將焉如死生建業信徒語石盆古渡猶
多魚古人已去安足齒近事紛紜尚如此君不見淮淝去
歲是豐年如今千里無舍煙

浪語集鈔

十四

次韻李浩然喜晴

我愧子康之治密其雨其雨而出日靡神不宗始霽霈將
爲有年吾事畢豈其霖霖澍霖靈靈霽又爲心首疾視將
圭璧走羣望祈社禁門勤屈膝誠知惡積怒神天流毒匪
緣寒自慄甫田千畝垂有秋刈獲敗之方秀實橫流場圃
澆洋洋茁茁禾頭多耳出仰天何怨俯何尤退省過愆知
自失牢愁僕僕事吁嗟風雨敢辭頰沐櫛忱誠雖至蟻蝨
微舒慘蒼穹焉可必都緣民困不聊生重以凶荒神以卹
義和叱馭黑龍僂倏忽清明開草堂不知帝力固全真謂
我貪夫寧直筆

豈其食魚河之魴河豚自美吳江鄉
臙蛙豕腹被文豹則如無趾黥而王我生
甌東到閩方規魚貫見梅花裝梅青不肯
候春雪菘芽靜嘯垂飛楊古來多魚吳武
昌薄遊三月新初嘗西施乳嫩可奴駱馬
肝得酒尤珍良無愁縷縷結中腸豐美肥
膈如切肪外皮甘滑裏皮厚令人忘却美
鳥郎舉之東海來三江會聞清濁斯滄浪
白龍未免豫且困膨臍唯唯浮魚梁氣衝
毳鞠何彭彭地遠都無橄欖香不知淡入
恣游泳極情性命徒爲戕腊毒厚味能人
凶何須西子齊文姜甚美由來必甚惡直
它一死言爲長鮑魚俗物休相妨良藥相
傳海上方盧根槐子豈足貴生龍之腦黃
龍湯

釣臺阻風去得風便

浪語集鈔

十五

先生非釣名魚釣清冷水太空長廓然浪迹秋光
淡人憂我何憂忘怒亦忘喜建武非漢元詎有留
侯起神明旋地軸姓字更七里雲臺已埋沒巖瀨
殊清泚峩峩二釣臺高插煙霞裏首陽遠相比萬
祀恒不圯我來經舊盧敢下瞻遺八東風迴我舟
江步時須艤仰觀巖像設敬拜謔煩鄙曾臺暢登
臨無復徒仰止縈迂古道屈望望扳蘿藟崇基介
崑石特立端不倚削成二山碧平止章如砥衆山
鬱青葱環合紛礪礪清塵森萬象觸躡同一視古
人不可見可見安仁美旅情殆忘返回棹西風駛
青蒲桂一席入望俄城市瞥如周變秦物物非古
始乃知主人意待我非朱紫送迎因下風忙遽均
倒屣烹茶出清泉盪饌羅雙鯉饌之

以珍羞浣濯予塵滓相忘語黑間不假談名理去留唯我
意今昔交汝爾此情固冥契何必親之子

張村

皇義寂已久澆俗無還淳如何張村吐香杏全其真豈不
有妻孥茅茨甘賤貧豈不憚疲勞務時勤籽耘脫俗未爲
貴而今焉辟秦青城足躋攀那染龜城塵杓杞薦盤蔬殊
非關養身安常樂有餘熙然阜長春笑其壽而康無知斯
體仁靜言逐臭夫迷途少知津猥云老人村郊荒絕酸辛
筋骨由堅強誰謂存其神井蛙議滄溟夫豈窺崖垠作詩
賦張村逝將同野人

二女篇

天聖中韓魏公居所生憂從其兄晤守齊安卽安國寺

浪語集鈔

十六

西廡爲書堂以居恒有二女子夜至衣冠高古容裝麗
甚公恬不以爲怪及去二女各曰妾非人也亦非仙人鬼
魅遊處再歲而言不及亂公德士也行矣卽推此澤天
下走讀齊安記屈原之死二女孝慈亦于此投江故武
昌郡人以五月五日競渡投角黍迎神舟上二女非仙
人鬼魅豈靈均二子之精爽耶不然何知人如此之而
後先居者莫之能見爲作二女篇

矜嫠二美人幽閒真種性色秀雪窻梅衣冠儷修正巖巖
韓稚圭寂寞自清靜虛室掃齋居展禽當季孟神遊問寒
暄不得窺信行怪力視茫茫久要交善敬語之非異類安
民公有命蓋聞楚靈均汨羅陳死証二子終孝慈雙玉澄
江映當初黃鄂人盪槳追游泳端午化成俗龍舸長舡競

事神微有道角忝勞將迎非鬼且非仙世士憑誰偵

記遊詩

延陵道士何希全爲人坦率狂易居天慶觀儕輩以風
子目之走初識諸妻家噍噍然一多言人也甲申歲至
西浙從婦之昆弟遊訪何之居則聞無人聲扣戶移時
而後希全者出肅賓而坐不交一談同行怪之視其齋
舍蓋凝塵滿屋胡牀雖設而拖泥之板亡矣意其非苟
然於世者客退而主人不送客彊之不辭及門謝以無
茶遂翻然而入詢其行事不語既有年矣晚遊崇勝佛
寺過僧道一不值眎八案間無非貴人竿牘中庭有枯
條不翦謂之龍華攷記案圖乃野菊之下品王公聞人
爲之歌謠者至積秩而加多走閱短卷圖書謂必法書
名畫開編而視乃其繪夢成圖一日之間所遇如此若
希全者可謂身如夢幻而道一者顧以夢幻爲真物之
不齊有如此者因思列子之言爲發一笑而作此詩
先生混物化浩若鶴與猿結曲此世間脩然脫籠樊冥心
遂無物得意亦忘言客至不點茶猶真破苔痕相逢蜀成
都過我故縣村遐觀夢中夢南膜佛因緣鄭人決真妾子
產不能賢寥哉天地間誰省物性偏夢覺各有殊從他見
一邊浩歌歸來乎虛堂好晝眠

跋蜡虎圖

刻木牽絲代不乏巧而偃師擅剗之技吹簫擊石師
有其能而后夔名制作之宗何哉蓋精義入神則神藏
其用至誠假物則物狀其形寫物之工亦猶是也婦弟

元可所藏虎搏豕圖其枯條衰柳於菟剛鬣疏毛設色
皆極能品之上至狀虎之蹲伏批豕頰而呷持之豕啼
失聲手跑足廢精神形度曲盡一時之理視之使人毛
髮森聳若彷徨乎其右也人以宣城繪人包氏善虎因
以包虎名之走謂包虎之形但像虎耳至狀真虎之態
包氏何足以知之夫真虎之形全於虎者不能到也故
走定爲麗歸真畫而名之曰蜡虎圖歸真梁人宋太祖
時以道士召對自言售畫得錢沽酒竟醉此外無能者
嘗爲廬山道人寫鷄而燕雀不敢來集其畫喜圖牛虎
常伏草莽以觀虎之出入或蒙虎皮而倣其搏躍之形
故其畫虎之工居神品上走知非歸真不解作此蓋惟
歸真爲能知虎非走無以識歸真也因跋以詩爲之序

浪語集鈔

十八

歲云暮矣露爲霜枯條脫葉衰柳黃郊原寂歷無人鄉獵
牙之豕充稻梁舍廳以遊神氣揚有斑者虎蹲在旁低頭
妥尾不大忙豕行過之不虎防虎往搏之搯豕吃豕忙故
步聲喚長虎如抱兒未遽央豕形雖在身命亡不如安之
充虎腸得之紙本君何從仙人道士形已忘解衣盤礴躡
宋王虎冠虎鞞虎跳踉百獸望之怖以惶寫鷓鴣雀爲罷
翔匡廬有潔清祠望請君懸之政事堂坐令帖伏犬與羊
君不見大索之祭通八方盛德百世祠是常又不見螳螂
捕蝻雀捕螳死生得喪不可償虎哉寧知蝟螭能爾哉是
非遠在天一方君其實之永世藏

孫元可賦張公石室詩句語險怪辭峰秀拔讀之如
神遊洞府而陵果爲之葍屬也非身行此洞不知

此詩之工蓋其質似虛全而文麗多之知又加鞭
當千里一瞬其視劉又馬異得名浪矣詩文與我
過當誠無足以當之牽韻勉酬真添蕪煮箒之舉

君不見談天衍有言九州之大惟一州無論青冀并營幽
我其放言學鄒子將子聽之無我尤我騎一紙白驢子蹠
梯跣路走上南山頭萬里以意行一息不暫留捨銜到空
洞且作秉燭遊呼來混沌老蝙蝠爾作精怪我則不從教
激風怒竅拔木折石一去旬有五日而後返但是有戶則
可由積蘇纍塊雖云巧達觀只與蟻蟻伴我有五雲車駕
以六蒼虬日月行已揭無人觸虛舟何曾見爾懸旌鳴佩
朗裝欲飛動玉柱校立直以修天篋甲子有窮盡爾乃祿
命難考求皇天大地僅若一雞子金烏玉兔銜得曉夜作

浪語集鈔

十九

箭浮我不知爾許事政覺兩耳風颯颯託死不復生一死
可作道者流況乃漢時五斗米師星河耿雙眸石壇一坐
一千歲坐視生滅水上漚水上漚且罷休休無休於無作
樂無樂於無憂仙人與世人壽夭如相齟清清爰靜爰自
正此舉獨步不可儔信是神仙足官府蜂房戶牖封君侯
我偶作此言不比亦不周爲何孫卿子謂我阮與劉爲我
謝孫子我才愧爾天一畝不如且飲酒耳熱徒歌謳可以
銷遣綿綿不斷萬古之悲愁悲愁銷遣幾時盡萬古之後
重有萬古來悠悠

春愁詩初玉川子

春陰苦亡賴巧解窮彫鏤入我方寸間釀成一百萬斛傷
春愁我欲挹此愁寸田無地安愁莠沃以一石五斗杜康

酒醉心還與愁爲謀愁腸九轉疾車轂擾擾萬緒何稠繆
愁思儻可織爭奈百結不可紉我與愁作惡走上千尺高
高樓千尺遡雲漢只見四極愁雲浮都不見銅盤之日缺
月之鉤此心莫與明愁來壓人頭逃形入冥室關閉一已
牢周遮四壁間羅幕密以網愁來無際畔還能爲添幽憂
我有籠文三尺之長劍真剛不作繞指柔匣以明月通天
虹玉燭銀之寶室可以陸割犀象水斷潛伏之蛟虬云昔
黃帝軒轅氏用斬銅頭鐵額橫行天下之蚩尤擬將此劍
斫愁斷昏迷不見愁之喉若士爲我言子識愁意不愁至
不忘以愁生有來由閑愁不足計空言學莊周日中之景
君莫避處陰息景景不留疾行嫌足音不如莫行休因知
萬慮爲縈愁之縛忘懷爲遣累之舟歸來衲被蓋頭坐從
他鼻息鳴駒駒取友造物先許漫相與遊朝躋叫閭闔夕
駕樓丹丘天公向我笑金母爲我謳酌我以瓊漿玉液朝
陽沆瀣之濃齊俾我眉壽長千秋却欲強挽愁作伴愁忽
去我無處蹤跡尋行輝惟有春華鬪春媚一一倩綉開明
眸又有平蕪綠野十百千萬頭鈍悶耕田牛踏破南山特
石頭

貴遊行

沙堤大蓋何穹窿底人佩玉鞶蒙狻猊如熊虎馬游龍誰
何出入咸陽宮笑刀瓠體顏芙蓉步趨持重爲雍容諸侯
爰統掌百工調元爲職禪九重萬錢一食聲鼓鍾猶言下
筓終無從異時糠噉腸不充家徒壁立其室蓬抄撮語麗
文彫蟲繪爲綉句欺南宮不分菽麥儔知儂且無萬卷漉

曾中脂韋媿宴陳小忠竭民膏髓自爲功榻前觸事惟迎
逢肯思責難始爲恭君王謂賢拜三公門如沸湯賄賂通
財侔縣官邑侯封積金猶欲齊濬密家有錢爐非範銅賣
官鬻獄揚成風後房的爍燕支紅皆民女婦來無蹤有憂
失得常怵怵殺賢賊能摧英雄汲將同類塞要衝害苗之
心饒蝗蝻忽變射羿逢蒙弓怡然自得豁心胷黯如抹漆
何亦衷向人自欺吃匪躬高自標置人盲聾言立便擬稱
儒宗學禪逃俗坐談空元非友朋相磨礱世間將謂無軻
雄言出波流士與農却矜巧宦官既穹笑伊魯儒嗟道窮
那知達人節青余眎而土苴及蛆蠱古今異時理道同茲
邪未必皆令終君不見晉朝失國隳金墉爲奴爲齒豈惟
懷愍巡北戎

谷里章

浪語集鈔

二十一

上有青山下有滄洲步有回波面日紅流吞吐風雲呼吸
背昂審能處之可銷憂退谷中人常笞箬山中繚繞茅舍
旁寒泉之流激琅琅雙石西峰我在東無情鈎加此漫郎
性情荒浪氣志剛東鄰之人揮鈎車胎鏢孤鱗浪屋加鈎
綸相投不遑舍聲齟會攝歸吾家我蓑我笠聊自娛沒溺
愧彼鄰舍漁沙門招提宅谷西金僊宮殿雲漢齊撞鍾擊
磬禮耶毗子欲詣之持清齋箇中有人坐無爲飢食困眠
氣咎醜撫掌怡然笑呵呵吾昏將奈此子何漫歌八曲音
清冷風高水寒三歎聲勿哦大洞修黃庭谷中之樂實難
名長江北來樊水流東樊山水曲大同中儵儵之魚泳洄
洋鈎舟漁人鼓鳴榔浩歌一闋清滄浪終焉無求漫相忘

大江之東叢石起巖巒聚石江鳴水小回中間浪不惡釣
臺嗟峨瞰城郭去來客船是中泊浚成二闕回中曲豪人
仲謀當漢衰建安之際鼎祚移江淮萬里吳帝之冕旒十
二龍卷垂輅車華蓋日月旗荒墟之中不可求宮室故處
春草青長刀大劔可治生我先田老相次耕大夫勸相歌
三成江北洲西陽國蕪城桑柘彌阡陌婦可力蠶身力穡
四歌不用愁衣食一元大武牽何之良田附郭吳東陸牧
童田父麻單衣叔閔修治木馱馱從吾真者真吾兒西陽
罷田飽飯嘻五歌六歌神自怡李甥叔靜蕩兩槩弱翁將
船欲安往大回小回開釣魚送客便擬酣睡如酒徒之謂
謾浪名世俗交加激不聽行無惡客相逢迎醉歌七終將
八成杯樽環湖上坏亭浪翁杯飲醉少醒嬉然自打舡

康齋集鈔

二十二

行旅蕭蕭荷出青萍仰天大笑風冷冷坏湖西南爲退谷
壽藤巢藥繁壽木清泉聳注匯焚曲醉耳琤璫亂鳴玉城
中交生縮銅墨身備四殊攸好德窪樽日醉主與客挾以
石門天地窄坏湖退谷人好游可厭之類乃所羞忽焉草
木成高丘此游此泛生幽憂泉明之風繼者誰士源孟子
接武來嚴霜皓雪春風熙倒置日月寒溫移來游者子充
良子能得之可勿疑此道不迂不回適子能識之可游佚
勉強行之今是古谷中之人君踵武狂生作此谷里章意
追浪叟俱商羊松風颼颼蘭草香與君壽考終不忘

